

陶文毅公全集

陶文毅公全集卷七目錄

奏疏

漕務

申禁幫船加索津貼並酌擬調劑旂丁摺子

嚴禁衿棍包漕橫索陋規附片

請將漕船改由丹徒橫開出江附片

覆奏現辦漕運情形附片

查覆太倉等處並無漕書毆辱生監摺子

再陳太倉州漕書並無毆辱生監實情附片

蘇省辦漕無庸另定收數附片

覆奏蘇省錢漕查禁幫費陋規摺子

籌勘回空漕船改由大江至丹徒橫閘試行入口

摺子

回空漕船俱由橫閘進口附片

會同總漕恭報重運二進漕船渡黃完竣摺子

會同總河總漕恭報重運漕船全數渡黃摺子

冬雪放晴漕船出江清高於黃各情形附片

會同蘇撫等辦蘇松等屬漕務情形摺子

酌定江廣幫船過關查驗章程摺子

籌議約束水手章程摺子

奏疏 漕務

申禁幫船加索津貼並酌擬調劑旂丁摺子

奏爲申嚴幫船加索津貼舊案並酌擬調劑旂丁緣
由恭摺

奏祈

聖鑒事竊照江蘇省各屬現屆道光六年辦理新漕之
期經_臣將歷年積弊確切指飭嚴督司道府州各
縣等預爲籌畫實力整頓伏查各屬漕務首禁浮
收而浮收之源每由於旂丁索加幫費緣幫船領
運漕糧沿途過閘起剝添裝扛具雇覓人夫在在

需用往返經年所領漕項銀米不敷是以厯屆兌
漕州縣有協濟旂下一項原屬格外津貼特因積
習相沿該幫丁視爲應得妄思逐漸加添每以倡
率停兌爲挾制之端以捐勒通關爲刁難之具而
江淮興武二幫藉口向無屯田橫索尤甚經前督
臣孫玉庭於嘉慶二十二年九月內

奏明將江淮興武二幫籌款生息調劑仍同蘇松常
鎮各幫統以米石多寡按水次舊章酌給津貼毋
許苛索欽奉

諭旨允行並奉

諭漕糧受兌之時如米色潮溼攪和者准其稟報糧道查驗參辦若米色純潔該弁丁等仍敢停兌吵鬧及措不出結者立即從嚴懲治以杜刁制等因欽此在案惟是日久舊弊仍滋兼上年漕糧阻滯河北接運本年各省漕糧不無疲累近來水手舵工人等往往勒加雇價正須懲創而糧船出外兩年甫得歸次修艖一切更得有詞需索若幫丁託詞多索於州縣則州縣亦必藉口浮收於小民因而刁生劣監包攬串抗弊竇叢生動滋延誤自應申明舊例欽遵前奉

諭旨於酌定津貼之外不許絲毫需索倘或該幫丁等仍蹈積習無端停兌捐不出結定當按律從嚴治罪以肅漕政而挽刁風惟是剔弊固應從嚴卹丁尤爲切要臣再四思維別無調劑之法惟查幫船重運本有例帶土宜一百五十擔回空土宜八十四擔若水勢果足尙可量爲加增卽偶值淺阻亦無難相機剝送以南北有餘之物備彼此相需之用事不勞而費不增於旂丁卽可藉資調劑自爲營運而州縣少一分需索卽閭閻少一分浮收似屬權宜之一端可否仰乞

天恩准其於例帶土宜之外每船重空二運各添帶若干擔以資貼補之處恭候

敕下漕臣核議請

旨施行再漕委各員原爲催重趲空而設但沿途碁布星羅年來員數太多難免需索實爲丁船之累亦應請

旨敕下漕臣按例酌委毋庸多派員弁以杜滋擾而需索旣省丁力亦舒於漕務似有裨益所有臣籌酌查辦緣由謹繕摺具

奏伏祈

皇上聖鑒訓示謹

奏

道光六年十一月初二日奉到

硃批另有旨欽此又於例帶土宜之外添帶若干擔句
傍奉

硃批添帶土宜事尙可行若致船身笨重遲延則大不
可又於漕委員數太多難免需索句傍奉

硃批實在情形又於毋庸多派員弁句傍奉

硃批甚是同日奉到道光六年十月十七日內閣奉

上諭陶澍奏申禁幫船加索津貼並酌擬調劑旂丁一

摺向來兌漕州縣有津貼旂丁一項原爲幫船領運漕糧沿途過關起剝等項之用近來積習相沿幫丁輒藉口疲累託詞多索著該撫嚴行申禁如幫丁等於酌定津貼外輒行需索卽從嚴究辦以儆刁風至漕委各員往往藉催重趲空爲名任意添派員數太多難免婪索殊爲幫丁之累各省軍船行走沿途催趲稽查辦理已屬嚴密何必增派多人徒加紛擾著楊懋恬查明漕船經過地方酌定章程派委員數分別重運回空開單奏明立案總期可省則省毋得多派致滋擾累其幫船本有例帶土宜該撫請量爲加

增自屬權宜調劑事尙可行惟攜帶過多恐船身笨
重遲延於漕行不免有礙並著該署漕督體察情形
每船除例帶擔數外約可添帶若干核定具奏一面
通飭各幫照辦俟漕運照常丁力稍裕仍照舊例攜
帶以符定制欽此

嚴禁矜棍包漕橫索陋規附片

再臣陶澍查江蘇漕務疲敝已久在閭閻則每苦浮收在州縣則又患刁抗緣江蘇漕額最重一州縣之地廣袤不及百里而漕米則有三五萬七八萬至十餘萬不等小民終歲勤動完漕而外所餘無幾以故特升斗赴倉者一遇風節折耗已不勝其苦加以使費倍覺繁難而蠹書漕總復多朘削近來生齒日增食用日貴尤屬支持不易此所以完納難前而深病浮收之實情也其在州縣則終年之用度在此通省之攤捐在此兼有

奏明彌補舊虧酌提羨餘接運銅鉛木料船隻歲挑
徒陽運河均須協貼厯有成案在

國家經費有常不能不藉資津貼而合算卽以萬計
其需用尤急者則旂丁津貼一項前任督撫臣荆
道乾阿林保等均經奏及復經孫玉庭成齡陳桂
生等奏定以每米一石津貼銀二三錢多者不得
過五錢然計漕多之處裝載軍船百五六十號總
須用銀三四萬至六七萬不等非必藉以入已而
抗玩者卽因此挾制以爲控端或船已開行米尙
未完謂之漕尾展轉那墊釀成參案此又州縣用

費較繁深患刁抗之實情也斯二者在顓頊之州
縣未必諒百姓之苦在顓愚之百姓亦未必悉州
縣之難互相詬病而皆不爲無因祇有寬一分得
一分以養閭里之元氣辦一事省一事以免州縣
之藉口由漸而理非可程功於旦夕也惟有一種
病官病民大爲漕害革除不可不亟者則包漕橫
索陋規之生監是已大約富豪之家與稍有勢力
者皆爲大戶亦有本非大戶而詭寄戶下者至刁
生劣監平日健訟者則爲訟米其完納各有成規
而訟米尤甚每於開徵之始兜收花戶由單以同

姓爲一家集零戶爲總戶一經攬收入手或醜米
捏交或掛籌短數或任意遷延捱至漕船緊迫時
勾通胥吏不呈由單硬開戶名包交呼朋引類晝
夜喧呶稍不遂意非逞兇鬧倉卽連名捏控不休
竟有田無一畝而包攬至數百石者亦有米無升
合而白食漕規自數十兩至數百兩者人數最多
之處生監或至三四百名漕規竟有二三萬兩實
駭聽聞在州縣因漕事方亟稍遲卽罹處分不免
買靜圖安其貪狡者卽因此勾結紳士通同漁利
其庸懦者但仗漕書爲之抵禦而權旣下移弊更

叢出漕書或轉借刁徒之勢以恫本官層層脅制
陋規日添而費無所出則惟有取償於鄉曲之淳
良小戶爲牽長補短之計以致浮者益浮苦者益
苦在小民方痛心疾首莫悉作俑所由而不知該
生監所訛之陋規卽鄉里窮黎之膏血也伏查嘉
慶十年五月二十六日刑部議覆鐵保等審擬吳
江縣勒休知縣王庭瑄那移虧缺數至累萬皆因
刁生劣監在倉吵鬧勒索陋規所致欽奉

上諭朕聞各省劣衿以收漕一節持地方官之短長而江
蘇爲尤甚各該州縣或平日與之交結遂其取求慾壑

既盈卽遇不肖官吏實有罔利營私等事亦復祖庇不言徒使鄉里小民暗遭腴削設稍不遂意則遇事輒生枝節每屆開徵時捏交醜米藉端滋事動卽以浮收漕糧列名上控其實家無儋石無非包攬交收視爲利藪此等惡習大壞名教今吳江一縣分得漕規生監已有三百餘人其餘郡縣可想而知朕培養士子至優且渥原望其束身自愛鍵戶讀書並當勸化閭里愚民知所觀法方不愧四民之首乃蕩檢踰閑至於此極尙靦然廁身士林乎所有吳景修等三百十四名朕卽概加以扑責亦其自取但欲養其廉恥此次姑免責處予以自

新之路着鐵保汪志伊會同莫晉督飭該教官等嚴切
教導隨時管束務使該生監等痛除前非安分守法如
遇收漕時該州縣果有浮收入已情事自應據實劾參
倘該生監等不知悛改仍蹈故轍或此外刁劣紳衿有
把持漕務訛詐陋規等事砌詞控告審屬子虛者一經
查出卽當奏明從嚴治罪決不寬貸欽此仰見

聖明洞燭無微不至凡有人心自應永遠恪遵無如刁劣
之徒難期悛改溯查數年以來無歲不有告漕之
案自百起至二三百起不等惟今歲漕糧改由海
運提用津貼無多無可阻撓挾持是以控案較少

然亦不下數十起此等積習相沿既藉控爲抗以
遂其包攬之私尤仗訟分肥以長其白規之數若
不將此項矜棍陋規痛行裁革糧戶大小一例兌
收則辦漕之經費日絀小民之浮削日增害伊何
底惟是積弊已深人繁勢衆一經整頓羣然觖望
大則糾衆鬧漕小則造謠興謗而京控之案必且
紛紛更多臣斷不敢因此稍避嫌怨而辦理不容
無序現已通飭各州縣嚴革蠹書不許入倉如敢
仍前縱恣立即提省究辦因思矜棍所執爲訟柄
者無非以違例浮收爲詞如果州縣假公濟私賍

削民膏自飽囊橐則是天良喪盡

國法難容查明後自應欽遵前奉

諭旨該州縣果有浮收入已情事據實參劾原係正辦臣

職在安民必當執法嚴懲以儆貪墨倘或米未清

完而遽行驀告則虛實未辨其告漕之人未必非

包漕之人刁風實不可長臣與督臣暨藩臬等酌

商嗣後控告漕案必須查其有無抗欠尤須查其

是否糧戶方可酌量准理倘係無糧之戶其爲包

攬何疑或有漕而米未交清亦當飭令完漕再予

審辦其集審時或原告避匿或不候訊結潛逃驀

控毋論審虛應辦卽所控不爲無因亦當治以驀
越刁訟之罪如此力挽頽風庶衿棍無可挾持而
陋規可革費用自省不致因大戶而浮加於小民
閭閻稍可蘇息矣所有現辦漕務情形合併附陳
伏乞

聖鑒謹

奏

道光六年十二月十五日承准

軍機大臣字寄道光六年十二月初六日奉

上諭陶澍奏現辦漕務情形嚴禁衿棍包漕橫索陋規

等語所奏甚是江蘇漕務疲敝已久閭閻每苦浮收而各州縣用度浩繁不能不藉資津貼抗玩者卽因此挾制以爲控端積習成風互相詬病必應力加整頓務令兩得其平旣不使不肖官吏婪索病民亦不容矜棍把持藉端訐告庶可官民相安而刁風漸息如所奏旂丁津貼一項前經奏定每米一石給銀二三錢多者不得過五錢漕督統轄旂丁自應飭屬嚴查不准絲毫多索而地方大吏深知疲丁苦累亦不得不照奏定數目令各州縣酌量給發俾漕船得以通行此項銀兩計漕多之處卽須用三四萬至六七

萬不等各州縣稍有浮收原非必藉以入已而包漕
矜棍藉此橫索陋規不可不亟行革除據奏富豪之
家與稍有勢力者皆爲大戶亦有本非大戶而詭寄
戶下者其刁生劣監平日健訟者則爲訟米完納各
有成規而訟米尤甚稍不遂意非逞兇鬧倉卽連名
捏告藉控爲抗包攬分肥人數最多之處生監或至
三四百名漕規竟有二三萬兩實駭聽聞各州縣費
無所出自必取償於鄉曲之淳良小戶爲牽長補短
之計而窮民不堪腴削樂於詭寄糧名大戶生監等
包攬愈多盤剝并吞勢所不免將至小戶之糧田日

少辦漕之經費日絀不釀成巨案不止該撫既經見及自必能早爲之計力挽頽風著卽督同藩司將收漕章程體察情形分別酌定毋許浮多並嚴禁道府需索漕規及上司同僚揠薦幕友長隨等弊一面飭屬遵照一律兌收矜棍陋規痛行裁革此項積弊已久人數衆多當整頓之初怨謗沸騰甚或糾衆肆鬧捏詞京控固爲勢所必至該撫惟當不避嫌怨不稍偏徇無庸預存畏蒞之見遇有控告漕案者卽查其有無抗欠是否糧戶如實係生監包攬或大戶紳士恃符刁抗或有漕而米未交清或集審時原告藏匿

或不候訊結潛逃驀控均卽提拏嚴審奏明分別治罪朕必從重懲辦並著該撫移咨學政一體查察如浙江學政朱士彥於貧生拖欠錢糧無論數目多寡悉行扣考固覺過重若拖欠較多實係有心抗糧者亦應停其考試俟完清後再行補考倘有仍前縱恣者該學政亦卽查明斥革移咨該撫審辦不得稍涉徇縱至各州縣被控浮收銀米總宜查明是否格外增多有無侵吞入己分別辦理惟在該撫一秉至公實心整飭不徒出示曉諭仍成誥誡之虛文也將此諭令知之欽此又於道光六年十二月二十日奉到

殊批所奏甚是必應整頓之事另有諭旨欽此

請將漕船改由丹徒橫開出江附片

再臣查徒陽運河水無來源歲仗挑挖以引江湖然挑挖止能及於河底而江水之起落無常一遇西風或雨水稀少卽不免陡落或一二日間落至數尺雖挑挖深通而亦無潮可入是以向來漕船經過必俟春深水發始能暢行本年因湖河水勢難定欽奉

諭旨明年新漕四月內掃數抵壩以便趕早渡黃是江浙漕船尤須節節催早與往年行走情形迥不相同現經臣嚴飭各工員趕緊挑切寬深毋稍懈怠

並將著名古淺之豬婆灘另行籌款雇夫挑深至
二丈有餘淤泥軟沙爲之一罄漕船諒可無阻惟
開行須早潮水難恃萬一淺滯不得不預切綢繆
查明代漕船由武進縣之孟瀆河入江逆流而上
經黃牛山山門過焦山以達瓜洲嘉靖六年始
濬丹陽至京口諸處淤淺令運船避孟瀆風濤之
險事載明代會典足徵往時漕船本可由江直上
不專恃徒陽運河也第從孟瀆沿江至瓜洲計程
百里而遙且孟瀆已淤塞刻難議復臣往來丹徒
境內見有橫閘越閘均係由運河通江之路民商

船筏出入甚便其地在焦山南岸稍東數里較孟
瀆達瓜洲舊路約近十之七八橫閘視越閘尤近
若漕船從此出江用紅船引帶過焦山抵瓜洲口
不過三十餘里半日可到詢諸土人兼查舊卷前
此嘉慶二十四年冬間因潮小阻滯漕艘未能歸
次曾將浙江回空船隻不入京口逕從橫閘試行
議者紛紛以爲船經焦山旁多礁石設有疏損誰
執其咎遂將各船截回其時先到之船業已過閘
駛入運河並無妨礙可見橫閘出江非不可行實
由人情之畏難而苟安也

臣

思江廣漕船由長江

千數百里始抵瓜洲所過崖磯如焦山者甚多是
江浙漕糧由閘出江亦祇須設法防護不必因此
畏縮至漕米經由江河損壞之事亦所時有自應
照例辦理惟事係預籌必須

奏明庶免臨事觀望所有來年漕船仍由京口運行
原不必總總過計倘或潮枯淺滯臣卽當親詣江
閘相機籌辦斷不敢稍涉輕疎亦不敢坐視延誤
理合附片陳明伏乞

聖鑒謹

奏

道光六年十二月二十三日承准

軍機大臣字寄道光六年十二月十五日奉

上諭陶澍奏徒陽運河挑切寬深惟來年江浙新漕須
趕早抵壩渡黃恐屆時潮小淺滯難行另籌由閘出
江之路等語本年徒陽運河業經該撫飭屬挑切寬
深並將古淺之豬婆灘雇夫挑辦來年江浙漕船經
行諒不至有阻滯茲該撫慮及彼時潮水尙小恐誤
漕行查有橫閘越閘均可由運河通江而橫閘尤近
若由此出江經過焦山抵瓜洲口僅止三十餘里半
日可到係爲先事籌備之計惟江浙漕船經臨徒陽

自應照常由正河行走最爲穩妥著該撫察看情形
倘屆時潮水不旺實在淺阻難行該撫當親往江閘
相機籌辦務令漕艘迅速暢行不可稍有延誤將此
諭令知之欽此又於道光七年正月初二日奉到

硃批另有旨欽此

覆奏現辦漕運情形附片

再臣前奏徒陽運河估挑寬深惟新漕開行須早誠恐屆時潮小難行查有丹徒縣之橫閘可以另籌出江承准軍機大臣字寄道光六年十二月十五日奉

上諭徒陽運河業經該撫飭屬挑切寬深並將古淺之豬婆灘雇夫挑辦來年漕船經行諒不至有阻滯茲該撫慮及彼時潮水尙小恐誤漕行爲先事籌備之計惟江浙漕船經臨徒陽由正河行走最爲穩妥倘屆時潮水不旺實在淺阻難行該撫當親往江閘相

機籌辦務令漕艘迅速暢行不可稍有延誤等因欽
此除恭錄轉行欽遵外伏查徒陽運河原係鑿山
而成兩岸陡立崖土易傾兼之潮汐挾沙而行水
去沙停動形淤塞定例每年小挑一次六年大挑
一次而挑濬時又必俟江浙回空過竣之後夫役
人等每因天寒期促挑出之土未能遠送別處多
有墊崖貼腮之弊一遇雨雪仍行坍卸入河以致
河身淤淺船行阻滯此次輪屆大挑工段綿長經
臣嚴除積弊疊飭道府督率工員認真挑挖現已
如式報竣長河一律深通連日雪雨應期運河有

水此後江湖旺盛自應照常由正河行走以臻穩妥倘或屆時潮水微弱淺滯難行臣卽當親詣江閘相機籌辦務俾漕船穩速趕赴禦壩趁早渡河免致盛漲經臨又有借黃倒灌之虞以全大局臣於挑河竣事時沿途諄飭各幫弁毋許需索支延現在鎮江常州各船業已兌開次第渡江駛入瓜口蘇州首幫亦已就道計各屬漕船早開且多爲向所未有察看水勢亦足資浮送各船跟接前行足慰

宸厪理合將奉到

諭旨暨現辦漕運情形附片覆陳伏乞

聖鑒謹

奏

道光七年正月二十九日奉到

硃批辦理甚好欽此又於夫役人等每因天寒期促挑
出之土未能遠送別處多有墊崖貼腮之弊句旁
奉

硃批此等積弊最爲可惡夫役人等無足深怪大小官
吏天良何在必應嚴飭所屬以收實效勉之又於趕
赴禦壩趁早渡河免致盛漲經臨又有借黃倒灌之

真等句旁奉

硃筆連點並奉

硃批此是要緊處又於現在鎮江常州各船業已開兌

次第渡江駛入瓜口句旁奉

硃批好欽此

查覆太倉等處並無漕書毆辱生監摺子

奏爲遵

旨查訊太倉鎮洋青浦等州縣並無漕書蓄養打手專
毆控漕生監之事據實覆

奏仰祈

聖鑒事案查本年二月承准軍機大臣字寄奉

上諭辛從益奏漕務積弊情形一摺該學政奏稱近日
太倉鎮洋青浦紳士各公呈漕書蓄養打手專毆控
漕之人恐亦不盡無因著該撫嚴行查訪隨時究辦
等因欽此

臣

查州縣收漕遵照歷年成規辦理如果

刁抗之徒包攬索規藉端滋鬧不難治以官法豈容縱令漕書肆行毆辱自應嚴訊究辦檢查歷年控漕案卷並無呈告完漕被毆之案惟上年七月內有太倉州職員俞世英等以請禁太倉鎮洋書役私行毒毆等情赴學政衙門具控經學臣辛從

益批飭以紳士等事不干已聯名具呈蹟類打幫

咨

臣

委員查辦當經

臣

飭行兩司秉公查訊隨據

詳稱按照原呈內牽涉情節逐細查明或係本無控案或係已結詳銷均無實據並據委員等查覆相同經臣咨覆學臣在案又上年十一月內准學

臣
咨據青浦縣貢監胡道怡等呈請飭禁書役毆辱生監等情一案亦卽飭司查禁並令將指出之漕書蔡錕標飭縣先行斥革解省歸案訊明究辦亦在案茲蒙

聖諭指示臣恐先後查訊各情尙有不實不盡復飭提兩案應訊人證及各原呈等來省札委兩司督同蘇州府知府陳鑾候補知縣李鴻鈞虛衷研鞫毋許稍涉偏徇去後現據藩司梁章鉅臬司覺羅慶善詳稱提訊該州縣漕書吳誠等並無蓄養拳勇之事質之俞世英等僉稱誤聞有完漕被毆之事

實未眼見亦不能指出憑據自認冒昧具結詳銷
前來臣以俞世英等公呈內稱有監生陸鏊被鎮
洋漕書毆辱並稱拳勇毆人有隔年傷三年傷等
名目監生王寶文於道光二年三月被毆延至五
年六月傷發身死文生王之楨於四年被毆回家
身故事關人命情節重大何以當時屍屬並不報
驗訊究迄今已久始據該職員等從旁援爲訟柄
而又不赴地方官控告據所牽列事在數年以前
於現任人員無涉無庸迴護復飭委員提省諭令
俞世英等據實指出以憑究辦反復駁審該原呈

等毫無指證均稱王寶文王之槓實係病故懇求
矜全等語其陸鑒兄弟係太倉監生並無鎮洋應
完錢漕所稱經過倉外被毆不能指出毆係何人
至胡道怡等所呈亦據該委員等確訊詳覆盡屬
子虛伏查太倉州鎮洋縣職員俞世英青浦縣生
監胡道怡等以事不干已摭拾浮言先後聯名具
呈難保非串通扛幫挾制以爲需索漕規地步本
應究辦姑念到案卽行供明堅稱並非有心誣捏
從寬免其置議俾予自新吳誠訊無毆人情事惟
查其平日不善辦公業已另札斥革亦無庸議

臣

惟有欽遵

諭旨隨時隨地據實稽查無許蠹役稍滋事端按照收漕成規毋得格外苛浮亦不容生監包攬刁抗藉端需索以清漕務而息訟紛所有查訊俞世英等各案緣由謹繕摺覆

奏伏乞

皇上聖鑒謹

奏

道光七年六月二十三日奉到

硃批所奏知道了秉公勉力爲之欽此

再陳太倉州漕書並無毆辱生監實情附片

再臣查學臣所陳漕務情形原係泛論並無指實

惟所稱拳勇毆人一節指明太倉鎮洋青浦等處紳士連名具控如果屬實必須嚴查重辦俾資整飭茲經一一訊明仍係無情之詞藉端捏控卽如詞內所列王寶文王之楨二案均關人命重情而當時屍親何以不控保長何以不報其無情一也不報不控而里鄰亦無聞見兇手亦未畏避其無情二也不控於屍親而控於毫不相涉之職監且不控於登時而控於數年之後其無情三也刑名

重案例須檢驗不控於有司不控於督撫而控於
不理刑名無案可查之學政衙門其無情四也定
例傷痕最重保辜或二十日或三十日極重之傷
加以餘限至七十日爲止今據稱王寶文以道光
二年被毆至五年六月傷發身死卽照保辜亦在
數年之外爲律例所不載洗冤錄所未有其無情
五也此等呈詞不待識者而知其僞卽學臣原批
亦以迹類扛幫駁斥矣乃復據以爲言未免自相
矛盾又學臣言告漕之人必實有頑抗乃予押追
今一例發回押追地方官恨其上控倍加抑勒仍

科以抗糧之罪等語查良民負屈求伸與才徒藉
端捏告名同而實異其間或一畝全無而妄稱捐
勒或升斗未交而遽行薦控或一人而包攬至數
十戶或一控而匿不赴審此等伎倆無非以控爲
抗藉訟分肥與良民之控漕者各別臣前摺聲明
謂必須查其是否糧戶有無抗欠正學臣所謂實
有頑抗並非凡遇告漕者卽行押發也况押發完
漕係嘉慶十六年前任督撫通飭舊章不自近日
始臣任內押發之案亦不過十之一二並無一例
押發之事不知何所據而云然臣前言才徒橫索

陋規庸劣之員但仗漕書爲抵禦權旣下移弊更
叢出層層挾制陋規日添勢必取償鄉曲之淳良
小戶爲補短牽長之計以致浮者愈浮苦者愈苦
乃此間受敝之實在情形言之可勝太息而學臣
以爲官吏婪索是其常態縱無此等生監而小民
之被苛徵亦不能爲稍減此正刁生劣監所執爲
口實者殊不思陋規卽出於浮收欲減浮收先裁
陋規實一定之理若逆料有司之不減而謂陋規
可存而不論已非釜底抽薪之計况整頓士習首
嚴義利之辨以主持教化者而爲此論似非所以

訓士也學臣又稱年來生監因漕被革者多從未聞有漕書獲咎查生監被革或因漕事或因他案部中有冊可稽計臣兩年來審結漕案僅革去武生費長春費震雷二名監生朱心灼一名而漕書則斥革甚多如朱心灼案內卽革去漕書吉惠嘉蕭永瑞俞蘭言姜佩蘭姜定符倪顯揆六名奏咨有案其餘隨案斥革者不一而足係屬尋常事件例不咨會學政衙門學臣目所未見宜其詬爲事所未有也學臣奏藁自明奉

上諭後至今未見移送而外間傳述殆遍正恐刁生劣

監恃以無恐則白規終難盡革而小民之累無窮
甚或釀成事端則所傷實多轉非所以保全善類
伏讀前奉

諭旨此項積弊已久人數衆多當整頓之初怨謗沸騰
甚或糾衆肆鬧捏詞京控勢所必至該撫惟當不避
嫌怨不稍徇徇無庸預存畏葸之見仰見我

皇上鑑空衡平無微不至一切阻撓牽掣情形早在

聖明洞照之中夫徇衆沽名其勢順而易力挽頽波其

勢逆而難臣來自田間受

恩深重斷不敢畏難而避怨致令刁風日長民困難蘇

所有遵

旨查訊漕案實在情形合併縷晰附陳謹

奏

道光七年六月二十三日奉到

硃批所奏俱悉勉副委任無恤其他欽此又於徇衆沽
名其勢順而易力挽頽波其勢逆而難四句奉

硃筆連點又奉

硃批是欽此

蘇省辦漕毋庸另定收數附片

再^臣前奏嚴禁衿棍包漕橫索陋規接奉

上諭江蘇漕務疲敝已久閭閻每苦浮收而各州縣用
度浩繁不能不藉資津貼抗玩者卽因此挾制以爲
控端包攬分肥人數最多之處生監或至三四百名
漕規竟有二三萬兩實駭聽聞生監等包攬愈多盤
剝併吞勢所不免不釀成巨案不止該撫旣經見及
著卽督同藩司將收漕章程體察情形分別酌定毋
許浮多並嚴禁道府陋規及揔薦幕友長隨一面飭
屬遵照兌收衿棍陋規痛行裁革並著移咨學^臣一

體查察等因欽此嗣於本年二月內學臣辛從益條

奏浮收積弊復奉

上諭該撫遵照前旨將收漕章程酌中定制等因伏思

漕務事體重大弊竇多端自水次兌開以至通倉

交卸皆有費用臣所言者白規學臣所言者浮收

浮收之弊人人能言而不能除正以費用浩繁而

幫費與白規尤其大者幫丁訛索必以米色爲詞

漕棍挾制必以浮收爲詞皆假正論以行私不遂

不休臣因漕務費重則收數亦重其害獨歸於小

民是以去歲首請

敕禁幫丁勒索加費次卽禁生監包攬橫索陋規以冀
稍清浮收之根爲補偏救敝不得已之苦衷今學
臣所奏多係正論其所舉浮收諸弊亦與臣前奏
所陳大意相同惟於費用一節一字不提似非揣
本齊末之道古云不患寡而患不均漕務收數之
浮正由不均所致茲蒙

諭旨督同藩司查明歷年收漕章程酌中定制洵屬持
平賴一永戢紛爭之至意惟查收漕一節前於嘉
慶年間督撫諸臣屢有八折完漕之議迄未能行
蓋緣年歲之豐歉不齊地方之繁簡亦異情形未

能一例此時酌定收數原爲津貼而設萬一不肖官吏久且視爲定額而更有所加則作法於涼非整頓之初意且刁徒訐告其意不在浮收而在需索卽使定爲加二亦無難以加五加六捏詞妄控臣與藩司等細加商榷漕米收數總以費用之多寡爲輕重幫規之外惟包攬與白規最爲漕害凡包攬與白規最多之處其收數自浮如江北各屬此風甚少故收數亦輕江寧及鎮江之徒陽金壇亦然常州則有包攬而白規尙少故收數亦不甚多若蘇屬之常熟昭文已實繁有徒吳江震澤自

嘉慶十年懲辦生監吳景修等三百餘人之後此風稍息如松江之青浦南匯等處太倉之鎮洋嘉定寶山等處食規之生監多至數百名且有舉貢在內銀數動以萬計前經臣奏奉

諭旨飭禁之後卽移咨學

臣

一體出示曉諭並飭各屬

嚴查蠹書不許入倉其收漕分數一體量減是以漕務甚急而輸將踴躍於正月望間幫船掃數開行趕副四月內渡黃

欽限較往年辦漕完竣早至一月有餘此卽革陋規以減收數之明效方冀陋規果能革盡更可逐漸遞

減以卹小民而清漕務嗣後惟有恪遵

聖諭力加整頓既不使不肖官吏浮勒病民亦不容矜
棍把持藉端訐告遇有控案仍查其有無抗欠是
否糧戶虛實無難立辨卽予懲治庶幾陋規可革
包攬可息辦漕之費旣省收漕之數自平似不必
另議章程轉虞窒礙所有蘇省辦漕仍循舊章毋
庸另定收數緣由合併附片覆

奏伏乞

聖鑒謹

奏

道光七年六月二十三日奉到

硃批所奏是隨時秉公認真辦理欽此又於既不使不肖官吏浮勒病民亦不容矜棍把持藉端訐告遇有控案仍查其有無抗欠是否糧戶虛實無難立辦卽予懲治八句下每句奉

硃圈又奉

硃批所見甚是總要行之以實漸加整頓方好欽此

覆奏蘇省錢漕查禁幫費陋規摺子

奏爲江蘇省徵收錢漕查禁幫費陋規恭摺覆

奏仰祈

聖鑒事竊臣等承准軍機大臣字寄道光七年閏五月

十八日奉

上諭據御史錢儀吉奏稱江南辦漕州縣津貼旗丁運費前經該督等議定數目每船二百兩至四百不等旗丁並未遵依十數年來逐漸增加每船多至千兩實爲該省一大積弊緣幫費旣重則浮收亦多今欲嚴辦浮收誠爲正論但幫費不除州縣從何取給若

使酌中定數不問紳民良莠一概均勻敷派則竟以私費爲正供尤斷不可行若竟不加限制習爲故常強索者不敢違困弱者不加卹官方何由而肅民力何由而繼請飭該督撫詳察情形妥議章程等語江蘇漕務積弊較他省爲尤甚在旂丁則藉口於長途之繁費在州縣則藉口於幫丁之需索而刁紳劣矜因得持其短長有所挾制惟安分士子良懦鄉民則任其苦累而不之卹尙復成何政體著該督等將該御史所奏情形悉心體察如何盡蠲宿弊官民既可相安旂丁足資辦運詳細妥籌奏明遵辦等因欽此

又於本年六月二十二日奉

上諭御史蔣泰階奏請嚴禁包漕劣衿添食忙規一摺
據稱江蘇省漕務之弊由於浮收而不肖生監等藉
此挾制分肥近來更甚於前漕規之外又添忙規名
目各州縣徵收錢糧時置立號籍每人應得若干按
名照給南匯鎮洋二縣爲尤甚竟有就職舉貢故紳
弟姪視爲成例首先瓜分自番銀一二百圓至二三
十圓以人之等差爲數之多寡一縣不下百數十人
需銀三四千兩不等再閱數年人旣日衆數亦愈多
請飭嚴行查禁懲辦等語州縣經徵錢糧本不許浮

收婪索其地方刁劣衿監坐索漕規歷經嚴旨飭禁近復新增忙規如該御史所稱一縣之中竟有多至百數十人需銀數千兩者公然坐食分肥按簿散給肆行無忌尤不可不嚴行懲辦著蔣攸銹等通飭各州縣實力整頓除漕規勒令裁革外并將新增忙規於開徵前嚴密查禁永遠革除如實有恃符抗違著名劣衿卽嚴拏從重究辦以儆其餘至州縣官旣無此項額外耗費倘仍有截留印票剋扣平餘等事亦卽嚴參懲辦毋稍徇縱俾不肖生監等無所藉口以息刁風而杜流弊將此各諭令知之欽此遵

旨寄信前來均經_臣等恭錄轉行欽遵在案伏查江蘇
賦額甲於天下在閭閻本屬支持不易而蘇松太
三府州尤甚其幫費亦較重於他處緣此三屬皆
濱近海隅產米潮嫩選剔維艱內如江淮興武等
幫向無辦公屯田難免藉口賠累丁索之官官問
之民刁生劣監遂起而持其短長訐控分肥包攬
牟利白規之風由此益熾輾轉相持其害獨歸於
小民實屬有乖政體不得不設法整頓是以_臣陶
澍前經

奏請

敕禁幫丁需索並嚴禁生監白規無許包攬訛索誠以
民爲邦本欲卹小民必減浮收欲減浮收先減浮
費欲減浮費則幫規與白規尤其大者實有如御
史錢儀吉所言費重則浮收亦多欲嚴浮收而規
費不除則正論亦止空言僅爲刁徒挾制之文而
已前蒙

諭旨令將收漕章程體察情形酌中定制等因經臣陶
澍以酌定收數原爲津貼第恐不肖官吏久且視
爲定額而更有所加則法立弊生不得不慮之於
始當與藩司細加商榷漕米收數總以費用之多

寡爲輕重幫規之外以包攬與白規最爲漕害惟
有力加禁革俾辦漕之費稍省則收漕之數自平
不必另議章程轉虞窒礙奉到

硃批所奏是隨時秉公認真辦理欽此是蘇省收漕情
形已在

聖明洞鑒之中臣蔣攸銛於本年閏五月奉

命南來卽經飭諭各屬務須禁戢刁徒裁減收數以利
漕務而靖地方復與臣陶澍再四籌商實惟有裁
省規費一法可以清浮收之根雖拂慾者不能無
怨而小民藉資蘇息係屬正辦捨此亦別無長策

現查軍船人等自屢經申禁之後兼值試行海運
與州縣隔絕無從需索將來河運復舊其幫費當
可遞減至需索漕規一節自上年欽奉

上諭飭禁刁劣生監亦頗知斂迹惟陋習相沿之處人
繁勢衆稍縱卽逝在所不免如御史蔣泰階所奏
漕規之外又添忙規名目竟有就職舉貢故紳弟
姪亦視爲成例公然坐食瓜分實屬爲害地方該
御史籍隸江蘇熟知本地情形言之確鑿爲保恤
鄉里窮黎起見臣等職在安民尤應時加察訪力
矢肅清惟有督同司道恪遵

諭旨實心整頓不避嫌怨嚴行禁革斷不容矜棍需索
無忌亦不容官吏浮勒病民有犯必懲庶流弊可
除而地方自臻敕帖矣所有臣等核議緣由謹合
詞恭摺覆

奏伏乞

皇上聖鑒謹

奏

道光七年十月十四日奉到

硃批知道了實力奉行毋畏難毋苟且毋避嫌怨焉欽
此

籌勘回空漕船改由大江至丹徒橫閘試行入口

摺子

奏爲丹徒運河水淺潮枯回空船隻難行臣親往籌

勘改由大江至橫閘入口恭摺具

奏仰祈

聖鑒事竊照鎮江府屬丹徒運河自入冬後江潮微弱

兼以久晴風燥底水枯耗該處別無水源接濟回

空糧船淺阻難行經臣

疊飭常鎮道鎮江府丹徒

縣設法罟撈催趲並將幫船所帶貨物飭令起卸

一面咨商漕臣

先提浙船進口其松江幫船或由

橫越二閘行走或在壩外守候先行挑河臨時再行酌辦當將情形附片奏

聞在案嗣據該府縣先後稟報運河口外及瓜口未渡各幫尙有一千二百餘隻因京口內河水淺僅及數寸松江幫船俱停泊江邊浙省各幫離江口更遠亦難漫越行走其橫閘至江口雖亦間有淺處現已一律挑平約計大汛每日可進船六七十隻至越閘尙在橫閘以下七里進口之路較遠閘門亦狹而高可作民船分走之路惟幫船拘於成例多有遲疑觀望等情臣隨於十一月十六日自蘇

起程帶同護理蘇松糧道陳鑾親至鎮江督同該
府縣逐一查勘自京口至甘露港三里甘露港至
象山五里象山至橫閘江口十二里沿江南岸均
係蘆灘刻已全刈多有緯道中間惟象山一處下
係石腳不能上緯不及一里風順一帆可過江船
亦能帶行對面卽係焦山冬令水淺並無急溜象
山以下仍是緯道直至橫閘船傍南岸行走惟東
北風須折戩其西南東南西北等風俱可順流而
下南岸帶緯並無險阻商民船隻往來不絕惟幫
船向未經過必須先爲試行

臣

當飭該府縣多備

熟諳江船引帶遴委文武員弁押送並經督臣漕

臣委員前來於十八日將松屬之興武八幫船二

十七隻興武七幫船一隻由京口開行是日晚潮

全行進開一路風恬浪靜行走平穩十九二十日

風色稍勁仍每日進船十餘隻復經臣帶同該道

將府縣等由江口乘船逆流而上適新授浙江糧

道宋其沅路過一同登焦山高處觀看見北岸水

平無石路亦可行遂將松白幫船四十五隻由北

岸用緯東行計自瓜洲大口五里至佛紺洲又十

里卽焦山北岸又五里益課洲轉南十里與橫閘

江口對渡踰時卽至是兩岸皆可行走如果風色平順潮水不致再落則在後浙江各幫自可接續由閘進口總使多進一船卽得一船之益以期趕緊歸次兌運新漕用副來歲早抵禦壩之

欽限其已入京口淺阻之船尙有一百餘隻現飭該府縣等設法催挽出淺刻日熬壩挑河併飭瓜口京口至橫閘各委員相風督催勿稍支延外

臣

因新

漕緊急卽日回蘇辦事所有回空糧船改由橫閘行走緣由謹會同大學士兩江總督臣蔣攸銍漕

運總督

臣

訥爾經額合詞恭摺具

奏伏乞

皇上聖鑒謹

奏

道光八年十二月二十四日奉到

硃批知道了欽此

回空漕船俱由橫閘進口附片

再臣承准軍機大臣字寄道光八年十一月二十

四日奉

上諭訥爾經額奏江廣各幫漫越浙江空船全出瓜洲口並鎮江一帶船行水淺情形一摺現在節逾冬至鎮江一帶水淺船行不能迅速該漕督擬照陶澍咨會或改由橫閘進口南下或先行築壩挑河俟開壩鋪水再行進口著卽相機妥爲辦理至浙江幫船阻守壩外水手人等聚集一方必應巡防彈壓著該漕督會同陶澍飭屬妥辦毋任再滋事端欽此查入冬

以來西風晴燥水落潮枯回空軍船阻淺京口以
內至豬婆灘一帶共計一百四十餘艘寸步難移
其未經入口掛江冒險復有六百餘艘餘俱停泊
瓜洲一帶水手人等刻虞滋事經臣咨商督臣漕
臣帶同護糧道陳鑾親往籌催飭令鎮江府趙光
祿丹徒縣吳浚轉飭各幫船改由橫閘進口當將
辦理情形恭摺具

奏並以橫閘爲向來漕船屢議未行之路各幫不免
畏難勘得焦山南岸一道雖中間有象山石腳里
許船由中洪半帆可過其上下均係沙灘可以帶

緯又北岸自瓜洲至益課洲迤南並無石腳更可用纜至橫閘江口對渡當卽派委護鎮江營參將金萬全等文武大小各員弁將停泊大江金山鮎魚套一帶船隻分頭齎持令箭催提其停泊江北瓜洲一帶船隻飭令京口水師副將莊芳機會同揚州府江都縣等巡防彈壓陸續押放出江一面飭令府縣多備帶江紅船察看風色引帶各幫進閘復飭丹徒閘官每日俟江船引帶幫船行抵橫閘江口卽催令出江接引後船不許稍有停延茲據該道將府縣等稟報自十一月十八日起至十

二月初九日將江浙幫船一千一百三十六隻由
大江催進丹徒橫閘掃數銜尾南下一無疎失等
情其京口內河膠淺之船亦經催送出淺南下查
橫閘以內水路寬展此後毫無阻滯惟恐進閘幫
船又復任意停泊現又飭令護參將金萬全及臣
標千總劉燦等尾趲迎提以期迅速歸次兌運新
漕謹遵來歲四月初十日早抵禦壩之

欽限仰副

宸厪再查回空幫船歷因京口冬底潮枯淺滯或車水
灌塘或築壩甬撈或截留江外遲至春間開壩始

得回歸自嘉慶九年至道光四年屢議由橫間行走皆以江路險阻爲辭甚至船已試行仍復截回此次經臣親往籌勘並經督臣漕臣委員前來督同文武將幫船一千一百餘號於二十日間連檣安穩過渡於漕運頓開捷徑不特回空迅速可免糧船水手聚集滋事兼得騰空趕辦挑河於新運事宜大有利益所有鎮江府丹徒縣及文武各委員實係分外出力與常年催趲糧船迥不相同自應酌加鼓勵容俟查明尤爲出力之員會同督臣

漕

臣

另行奏請

獎敘合併陳明謹

奏

道光九年正月十三日奉到

硃批所辦甚好前此朕亦懸念此舉曾經面詢額騰伊
據云橫間甚可行走可保無虞該府縣及文武等自
應量加鼓勵奏到時再降諭旨毋許冒濫欽此

會同總河恭報重運二進漕船渡黃完竣摺子

奏爲重運二進漕船渡黃完竣日期恭摺具

奏仰祈

聖鑒事竊照本年首進漕船渡黃完竣及首幫挽出江

境日期前由

臣張井

奏報在案查二進船隻先經

臣

陶澍專委提催又於

前來清江時沿途親爲催趲押令星夜行走惟因

洪澤湖水勢浩大清江浦以上至運口各閘壩溜

勢湍激高下懸殊提溜上行其勢不能迅速截至

三月三十日清晨趲入臨清堰內漕船尙不足一

塘之數啟放正需守待

臣

張井在壩次察看河湖

情形竝順黃壩誌椿存水核計清水已高黃水七寸因思高下無幾其力縱不足以刷黃而現在洪湖異常盛漲藉行漕以資分洩亦屬兩有裨益當將臨黃壩堰啟除清水卽時外注清黃交滙處所立見跌刷深通存塘船隻銜尾放渡後船隨到隨行至本月初三日將二進尾幫浙江杭嚴三幫船渡黃北上查二進共三十六幫計船一千五百一十隻全數完竣連前共過船二千五百七十五隻計五十九幫仍催令三進在前之寧波後等幫跟

接行走較去歲有聞之年二進船隻於四月二十三日渡竣本年計早二十一日伏查江境本年清黃竝漲月前適至相平辦理倒塘實虞遲滯今因湖水太旺反得暢出敵黃儻此後託蒙

聖明福庇黃水再能暢落或不再形加長則三進全漕竟可望清水浮送但節氣已交夏令黃水長發靡常臣等惟當隨時斟酌情形相機辦理以期運行安速早登

天庾仰慰

宸厪其邳宿運河循照向例飭令套塘提放現在開河

水勢充裕據報首進船二十五幫於三月二十六日挽出江境船八百零九隻計二十幫所有二進漕船渡黃完竣日期謹會同漕運總督臣吳邦慶循例由驛具

奏伏乞

皇上聖鑒謹

奏

道光十一年四月十四日奉到

硃批覽奏欣慰辦理甚屬得宜欽此

會同總河總漕恭報重運漕船全數渡黃完竣摺
子

奏爲恭報重運漕船全數渡黃完竣循例會摺具

奏仰祈

聖鑒事竊照本年漕船行走順利并下游運河因啟壩
洩水險要情形節經恭摺奏

聞在案查三進軍船自浙江寧波後幫起至湖南三幫
止共船一千八百一十二隻計三十九幫自三月
三十日啟放禦壩清水暢出順流放渡極爲順利
惟因揚糧廳鳳凰橋一帶吸溜甚大慎重挽渡倍

極艱難兼之江廣船身笨重窮一日之力僅得挽過三四十隻故河口一帶非不清水敵黃而待船過渡總覺零星臣等節次添委幹員前往下游會同參將張兆等無分晝夜併力催提截至四月二十八日已過三進船一千五百零五隻適黃水於二十九日至初二日節次報長後船又未全行跟接雖僅餘船三百有零亦未敢拘泥守候致使黃水裏漾內塘受淤卽於初二日將草閘及臨黃堰暫行堵閉併將禦黃壩上下東岸緯隄掣塌舊護埽長一百零七丈九尺一律補鑲完整一面嚴催

各船陸續抵壩趕緊起除草開臨黃堰次第放渡
截至五月初十日三進尾湖南三幫船四十八隻
渡黃完竣統計本年全漕除黃河以北兌運二幫
外實渡黃船九十八幫共四千三百八十七隻上
年重運船九十八幫計船四千五百一十五隻係
於閏四月十九日渡黃完竣本年計早九日道光
九年重運船九十六幫計四千四百七十一隻係
於四月二十九日渡黃完竣本年計遲十日道光
八年重運船九十八幫計四千五百六十四隻係
於四月十一日渡黃完竣本年計遲二十九日伏

查本年江浙漕船春間雨水甚多蘇常一帶河水
充足渡江尙不遲滯惟南船半入運河而洪澤湖
水驟見異漲淮揚一帶岌岌可危勢不得不於歸
江各處急籌分洩而溯查舊案從無於重運盛行
之時啟壩洩水之事臣等分投照料實有顧此失
彼之憂因創爲簽椿搭橋設關加緯之法節節挽
渡溜力東趨船行北上橫流緯挽萬夫雲屯在事
文武員弁無不各効全力如三閘之高下懸殊揚
糧之急溜湍激惟以力求慎重又不得不較之往
年添委員弁多雇緯夫雖時日稍覺稽遲幫丁亦

不無多費而至險之處未損一船間有被溜吸入
口門仍復挽提入運全數北來實非臣等始願所
敢豫期尤幸清水暢出各船順流渡黃歷一月之
久免於啟閉壩堰俾臣等得以西防洪湖異漲之
工東籌運河至險之地雖往來奔走頭緒繁多較
之往年照常辦理者難易迥殊然竟得於夏至以
前全漕渡黃完竣而洪湖水勢當盛漲之時天晴
無風旋即按日消落應行防護事宜又得從容籌
備卽下游洩水之處除歸江各路飭令接啟外其
高郵之車南中新等壩并可無庸早啟以保民田

漕行順速湖河安恬實賴我

皇上福庇所致

臣

等欣慶之餘尤深感幸現在邳宿運

河至楊莊一帶水仍充裕足資浮送截至五月初
五日止已出江南黃林莊境船三千零五十隻此
後江廣各幫經行喫水較多如水勢見消照例由
東省添啟湖口閘板俾資接濟亦不致稍有阻滯
所有重運漕船渡黃完竣緣由謹循例由驛會摺
奏報伏乞

皇上聖鑒再

臣

陶澍拜摺後卽回省辦事

臣

吳邦慶督

押尾幫前進

臣

張井亦卽前赴上下游各廳查驗

工程合併陳明謹

奏

道光十一年五月二十五日奉到

硃批所辦甚合機宜深慰朕心欽此

冬雪放晴漕船出江清高於黃各情形附片

再江省自秋冬以來雨雪連綿漕米多損兌運甚
艱連日天氣放晴人情歡欣其回空各船經過揚
關惟江西船隻頗多夾帶私鹽內有贛州幫旗丁
周張鍾竟以一船帶至萬斤之多業經拏起將失
於覺察之運弁邵廷魁先行摘去頂戴押船回次
交糧道審訊懲辦以儆將來仍將各船迅速督催
隨查隨放於本月十二日全數出江完竣趕緊歸
次裝兌新漕至黃河水勢現已涸落清高於黃二
尺餘寸計日春風解凍儘有暢出刷沙之望氣象

甚好堪以仰慰

聖懷合併附片縷陳謹

奏

道光十四年正月十三日奉到

硃批知道了欽此又於江西船隻頗多夾帶私鹽內有
贛州幫旗丁周張鍾一船帶至萬斤之多業已撥
起等句旁奉

硃批所辦好又於清高於黃二尺餘寸計日春風解凍
儘有暢出刷沙之望等句旁奉

硃批可謂喜出望外之事欽此

會同蘇撫籌辦蘇松等屬漕務情形摺子

奏爲蘇松等屬新漕因雨雪連綿兌開有逾冬限兼
米質受傷未能一律圓淨現在設法趕辦各緣由
據實奏祈

聖鑒事竊

臣

陶澍於上年十二月三十日覆奏常州府

屬緩徵摺內聲明蘇松等屬勘辦較早隨後亦被
雨雪此時業已晴霽情形能否不致加重新漕能
否不致竭蹶容與

臣

林則徐妥籌趕緊辦理在案

茲自拜摺以後雖復春雪連朝幸天色已霽各處
運米上倉俱知緊急查蘇松等屬上年勘辦較早

核定歉收分數現尙不致加重惟新漕起運事宜
辦理甚形竭蹶有不得不據實陳明者歷來收漕
惟恐米色之不純而現在並患米數之不足向來
辦運惟恐開行之不早而現在業已兌限之有踰
種種情形均非意料所及卽非成式所有緣上年
夏秋間蘇松等屬暘雨依時田禾暢茂原可期年
穀豐登不意於築場納稼之時陰雨兼旬天寒漿
凍顆粒未能飽綻以致分數頓減然猶冀天色晴
朗趕收趕曬或可期其乾潔奈又雨雪纏綿晴霽
日少以致收穀者或用火烘焙而米質已酥春礱

卽碎或帶溼堆貯而未曾曬晾霉變生芽或攤貯
幸未霉爛而究屬潮嫩一經試碾米色無不灰暗
青腰白臍尤所不免未能純潔實由於天時之不
齊也至蘇松等四府一州漕額甲於天下其實地
域縱橫不過三四百里按畝納漕所餘無幾雖豐
歲不敷日食茲旣普律被歉雖不至遽成重災而
分數暗傷通計各屬所缺已不下百十萬石之多
閭閻生計日蹙朝夕不飽輸納維艱其編戶小民
更恐納漕未及足額卽已瓶罄不得不買米交兌
質色更難純潔此又因急公而未能一律實亦天

時偶值之所致也又新漕起運例應冬兌冬開卽
遇災歉之年亦不敢有違定限今如期開倉而各
業戶或未曾礱米無可交倉或碾無好米難以收
納或竟爲雨雪所阻不能依期趕運赴倉而各州
縣更不敢於雨雪之下帶溼徵收致米色無可揀
選貯倉有發變之虞是徵收不克依期而兌開卽
不能依限此又幫船之兌開有差亦由於天時所
值也伏查例載徵收漕糧米色顆粒務須一律乾
圓潔淨倘實在水旱歉收米色不能一律圓潔者
該督撫預行題明請

旨辦理等語又嘉慶九年江省各屬歉收欽奉

上諭徵收漕糧米色過於揀選固爲慎重天庾起見但該省本年究經被災晚收之米未能一律純淨若過於挑剔小民輸將仍屬竭蹶且恐胥吏乘機舞弊著傳諭留心察看倘有實在不能純潔之處不必苛求或米色稍次皆可酌量收兌等因欽此在案伏查本年歉收係在秋災題報之後而情形更重實非向來所有現在爲期已促不得不設法辦理以全大局除各糧戶有米可納爲數較多者自應循照定例揀選米色純潔以重

天儲至於零星小戶有日食不敷米難足數者自不得不酌量買米完納冀資如額運送趕緊斛收以恤農艱而速漕運惟米色未能一律純淨并兌開未能盡如冬限實出天時臣等惟有趕緊設法辦理無分晝夜兼期趲兌趲運以速補遲源源北上仰副

宸注所有現在設法籌辦蘇松漕務情形臣等謹會同署漕運總督臣恩銘恭摺具奏伏乞

皇上聖鑒謹

奏

道光十四年二月初七日奉到

硃批知道了欽此

酌定江廣幫船過關查驗章程摺子

奏爲遵

旨酌定江廣幫船過關查驗章程俾資迅速恭摺覆

奏仰祈

聖鑒事竊臣接准部咨欽奉

上諭朱爲弼奏遵旨籌議剔弊速漕各事宜酌擬條款
請旨辦理一摺所稱飭提浙江江廣船隻無分省分
幫次先到先進瓜洲口趕趨來淮盤驗等語著陶澍
林則徐妥議具奏又稱灌塘幫船應酌減數目並加
寬塘河等語著陶澍麟慶妥議具奏又稱江廣各幫

經過九江蕪湖等關應迅速查驗等語著陶澍酌定
章程具奏等因欽此臣查漕船渡黃總須在伏汛未
發趕緊完竣本年重運抵黃因江廣後船過關稍
遲以致臨河漲發挽渡維艱必須預爲籌議俾來
歲新漕趕於黃水未漲前全數抵壩以資趨渡仰
副

聖主慎重漕務之至意所有灌塘幫船酌減數目加寬
塘河一條已經南河督臣麟慶會臣

奏覆其浙江江廣各船無分幫次先進瓜口一條臣

與江蘇撫臣林則徐熟商議

奏至江廣各幫經過九江蕪湖等關迅速查驗一條
當經轉行各關監督分別議覆前來臣查江廣船
隻例帶土宜一百八十石船旁跨木例准高寬各
二尺之多節省稅銀恤丁不爲不厚乃奸丁刁弊
罔利營私於例帶之外仍復多帶包攬甚或違例
於艖後拖帶木仔闖關漏稅自應嚴查惟查出截
留或遵例拆卸或留丁補稅爲時已屬稽遲於漕
行大有窒礙因思湖廣船隻向於九江上游田家
鎮武穴等處爲齊幫之所屢有九江關委員往彼
查驗糧船所帶木植高寬已足二尺卽會同押運

廳弁及地方官將客販木牌封固俟糧船開行再行開封以杜夾帶應於查驗後卽開具貨單於漕艘過關時委員按單嚴查給票放行江西幫船於九江姑塘上游青山地方爲候風之所向由江西糧道飭丁開明貨單陸續赴關報驗應由九江關立刻派委員役前赴青山亦按單查驗給票放行以下蕪湖等關卽照前關所驗之單按船迎驗給票不准一日停留倘查有例外多帶及舢後拖帶木仔若一一起卸入官大江風浪堪虞守待必延時日與其辦理掣肘莫若將多帶貨木立時核明

應稅銀兩卽於印票內當面註明發給放行不必
拆卸亦不必留丁質算統俟幫船過竣將何丁船
隻違例多帶之處由關彙報漕運總督查核並移
各糧道將應納稅銀照數追齊解關歸款仍將押
運員弁參處丁舵治罪如各關員役需索留難准
各省糧道飛稟以憑嚴飭立時放行仍將失察之
各關監督

奏請議處倘徑直過關不候給票卽照前督臣蔣攸
銘奏案俟糧船到通由該省總運丞倅查明無票
之船立卽具稟從嚴懲辦無許顚預支飾亦不必

追驗耽延如此定立章程庶丁舵知所做畏員弁
各顧考成關稅不致短絀而漕船亦無阻行程矣
除分別咨行漕運總督湖廣江西各督撫暨各省

糧道外

臣

謹恭摺覆

奏是否有當伏乞

皇上聖鑒訓示遵行謹

奏

道光十五年十一月二十三日奉到

硃批依議行欽此

籌議約束水手章程摺子

奏爲遵

旨籌議約束水手辦理章程恭摺覆

奏仰祈

聖鑒事竊臣前接軍機大臣字寄道光十五年九月二

十二日奉

上諭朕聞糧船水手類皆無籍匪徒性成獷悍均由習教之老管師父招雇上船各分黨與恃衆逞強以致在途互鬪殺傷劫奪行旅之案層見疊出卽如上年山東清平縣地方有廬州二幫水手王汶舉等鬪殺

多命今春鎮江前後兩幫水手復敢藏匿刀械施放
火器各案是水手逞兇滋事江浙幫船爲尤甚而此
外各省恐亦不免有此惡習朕因科道陳奏屢經降
旨諭令有漕省分及沿途各督撫漕運總督嚴行查
察隨時懲辦不啻至再至三乃兇悍之風至今愈熾
推原其故總由此等匪徒愍不畏法卽遇有重案審
明後正法數人該匪徒等亦祇視爲故常毫無警畏
幾成積重難返之勢現在辦理新漕若不乘此痛加
振作力清其源年復一年伊於胡底倘將來釀成巨
案尙復成何事體因思各省幫船爲數衆多糧道總

運各員稽查客有未周且運弁既慮生事端旂丁復受其挾制其沿途州縣營汛各員弁又因漕船行走不准停泊卽有械鬪搶劫各案祇得將就了事無誤漕行因而化大爲小化有爲無雖奉嚴旨飭查輒以並無案據爲詞一奏塞責而居民商旅隱受其害者實不知凡幾矣又何怪該匪徒等肆行不法有恃而無恐耶似此積習相沿深堪痛恨與其懲治於事後莫若防患於未然嗣後各幫漕船受兌之先如何責成旂丁雇募確有籍貫之人充當水手不由老管師父盤踞把持私相庇護至所過地方如何令幫弁旂

丁認真管束毋許滋事倘有鬪毆搶劫等案州縣營汛立即捕擒治罪不得因屍身拋棄首告無人輒爲諱匿不究其一種竊賊名爲放散風者如何設法稽查不許隨船行走著有漕省分各督撫漕運總督接奉此旨即將近來所有弊端虛衷商榷實力講求得其致患之源破其久沿之習通盤籌畫因地因時毋畏難而苟安毋因噎而廢食所有一切章程總期提綱挈領簡便易行俾匪徒無敢混迹而漕政永保肅清方爲妥善有治人而後有治法該督撫等均有兼轄漕務之責其各體察情形悉心妥議據實詳晰具

奏至江廣各幫向募本籍之人充當水手惟江浙幫船係雇他省水手類多無賴之徒把持盤踞沿途往往滋事嗣後水手應如何責成該旂丁等招募本籍之人充當著該撫一併查明妥議具奏將此各諭令知之欽此在案茲臣以述職恭

觀仰蒙

召詢及此臣伏思糧船水手兇悍之徒倚恃人衆逞兇肆暴仇殺劫搶均所不免而江浙幫船爲尤甚捧誦

聖諭洞若觀火情形畢照今若另募良善不任盤踞誠

爲拔本塞源之計惟江浙人多懦弱於撐駕笨重
軍船本非所習且軍船水手每幫多者數千少亦
不下千餘一時恐難更換況該水手之爭奪仇殺
本爲爭窩而起若換懦弱之人必遭其魚肉若換
強梁之人仍然以暴易暴轉滋事端至於防範之
法漕運則例原載有雇募時正丁取結十船連保
戶部則例亦載有頭舵水手互保具結及各給腰
牌等語皆祇可以防良懦而不足以戢兇暴臣思
更換另募必須行之以漸而禁暴除奸惟當持之
以嚴請敬爲

皇上陳之

一嚴查兇器也長刀利矛本非糧船所當用至於火槍擡槍尤爲禁物豈容水手收藏應請

飭漕

臣

於每年淮安盤糧時逐船按括一次俟抵天津回船又查一次其餘經過地方遇有事故隨時搜查以絕逞兇之具

一嚴寘重典也定例糧船水手夥衆十人以上執持兇器搶奪爲首者照強盜律治罪爲從減一等如十人以下又無器械者照搶奪律治罪立法不爲不嚴惟此例專爲搶奪而設且必須十

人以上至於劫奪殺人及仇殺慘殺之犯應無論人數多寡審明得實卽恭請

王命正法河干其同惡相濟之人但經殺人卽請照強盜律立正典刑游幫匪棍冒充水手劫奪傷人持刀拒捕亦卽照辦以昭炯戒其藏有火槍擡槍者雖未點放傷人亦應從嚴加發新疆俾兇徒遣散庶資懲儆

一酌寬處分也糧船過境地方文武俱有催趲之責一經停泊例有處分而糧船水手卽因以爲挾制之端以致逞兇無忌應請嗣後水手殺人

滋事地方官聞信查拏如罪人已得自應將糧
船催令前行倘敢倚恃人衆不服查拏停船抗
拒卽一面稟知漕務本管各官將該船暫泊以
便查拏懲辦俟交出兇犯再令開行倘敢棄船
走散卽另雇水手駕送尾隨各幫行走不必拘
定本幫仍將拏辦認真之地方官邀免處分庶
兇惡水手無可挾制而查辦可期得力矣如此
從嚴從實辦理庶幾刁風可戢而就案辦案不
致擾動大局自可俾資斂迹日就肅清矣所有

遵

旨體察妥議緣由謹繕摺具

奏伏乞

皇上聖鑒謹

奏

道光十五年十二月十六日奉

硃批另有旨欽此道光十六年四月二十日准

戶部咨內閣鈔出大學士等會議兩江總督陶澍
等奏籌議約束糧船水手章程一摺道光十六年
三月二十六日奉

上諭本日據大學士軍機大臣會同該部議奏約束糧

船水手章程一摺已依議行矣漕船水手人等類皆無業游民獷悍性成劫奪是其故技全在漕河及地方文武員弁認真查察嚴行懲治庶兇頑羣知斂戢而漕政得以肅清此次會議各條俱臻詳備惟是防弊之法不患立法之不善而患行法之無人果能實力奉行不致日久生懈則懲一警百自可立挽頽風著有漕各省督撫漕運總督及沿河各督撫務當遵照奏定章程嚴飭各該糧道遇案卽辦有犯必懲並隨時查察押運員弁及地方文武催趲各員等倘敢仍前玩泄虛應故事不能認真查拏卽行指名嚴參

從重懲處不得稍存姑息致日久又成具文經此次
諄諭之後各該督撫如再狃於積習不能從嚴從實
講求整頓將來積久生玩該水手等再滋事端別經
發覺惟該督等是問恐不能當此重咎也將此通諭
知之欽此